

Schnitzelbängg 2018 vo de 99er Ungrade



S'Komitee Därwil duet jubiliere
Syt 50 Joor düend si mehr oder weniger brilliere
D'Ettiger jubiliere au
Das Dorf intressiert syt 750 Joor kei Sau

E Lehrer wo di Schuelsagg durchs Zimmer gingt
Es git keine wo di zum Handschüttle zwingt
E andere Lehrer macht gärn mit Schielerinne mündlich
Und scho bisch gmäss Unesco Kinderfröndlich

Zerscht ä Metzg, denne ä Beiz, denne ganz viil Asylante
Jetzt ä riesigs Gfängnis, jä adieu dangge
S'Budget vo dr Gmeint, es duet euch nid freue
Wird verbrucht für z'viil Stacheldroht bim Leue
So viel Stacheldroht, sind die denne nid ganz bache
Immerhin händ mir dangg däm gwüsst, was für e Sujet mir könne mache

In Ettigä baue sii Marihuana a
Dass will ich probiere, dass muess ich au mol ha
Ich kiff mi erschte Joint und mini Händ wärde schwitzig
Nid emol bekifft isch das Dorf e bitzeli witzig

Ä Schissdrägg do ä Schissdrägg dört
Nomeh Schissdrägg do und nomeh Schissdrägg dört
Überall Schissdrägg, dr Weggli isch sich das gwöhnt
Darum isch är am Schwingfeschtl als Mr. Schissdrägg krönt
Dr Schissdrägg verdampft nid vo ellei
Chum Wggli nimm en doch hei

Dr Hürzi goht jetzt lieber mit Hünd go laufe
Dass isch au gsünder als Alkohol verchaufe
Die Hünd düend uns leid, dass muess me sage
Jetzt miend die das dumme Gschnur ertrage

E guete Doggtor het für alles e Rezäpt
Drum het dr Schroth Karli jetzt e ganz neus Konzäpt
Sit neuschtem gits bi ihm schöni Wullefingge
Wär öbis für di, dini Fiess düend ganz schön stingge

In Ettigä händ sii mit denne Gaschtguggene e riese Puff
Die eint händ sii falscht buecht, die änder löst sich uff
Liebi Gugger ihr miend euch nid verarscht vorkoh
Kei Mensch will halt freiwillig uf Ettigä goh